

福建叢書 第一輯

福建省文史研究館編

明·福清
葉向高撰

蒼霞草全集

(九)

福建叢書 第一輯之二

福建省文史研究館編

明·福清
葉向高撰

蒼霞草全集

(九)

江蘇廣陵古籍刻印社

蒼霞餘草卷之十一目錄

國子監祭酒贈禮部侍郎漢冲蕭公墓誌銘
通議大夫太常寺卿桂渚洪公墓誌銘

贈資政大夫戶部尚書西泉王公暨配贈夫
人高氏墓誌銘

封中憲大夫都察院右僉都御史仲齋蘇公
偕配恭人黃氏墓誌銘

資德大夫正治上卿南京吏部尚書汝泉趙

公墓誌銘

明文林郎廣東高州府推官嶠海王公墓

漢書卷之

銘

卷之二十一

蒼霞餘草卷之十一

福清葉向高進卿甫著

明國子監祭酒贈禮部侍郎漢冲蕭公墓誌
銘

漢陽蕭公以萬曆庚辰舉南宮第一人以廷對第
二人及第公第良譽亦同籍舉天下豔稱之以爲
盛事後公以文章識量重于詞林官至祭酒人皆
以大用期之而卒中忌者歸淹抑以沒沒二十年
會 上之初元大頒恩紀公子方伯君適以觀察
入 覲請于 朝始用前講幄勞贈公禮部右侍

郎予祭塋官其一予方伯君復請余銘其隧中之石余入詞林後公三年公第蓄之又與公爲僚于國雍甚相得也今之銘公其能辭按狀公諱良有字以占別號漢冲其先楚長沙路星潭州人也遷廬陵再遷漢陽之沌口世有隱德父爲文谷公某以明經貳守泰安州公七歲受易十五歲舉于鄉久之以春秋成進士授翰林院編修丁母憂服除補故官以會典勞晉修撰充經筵講官丙戌分考禮闈戊子典浙試己丑再分考禮闈管理諸勅久之晉中允管司業事再晉洗馬充日講官尋以諭

德兼侍講與纂章奏以庶子兼侍讀典順天甲午
試明年遂領國子祭酒公在史局十五年凡珥筆
橐經造士掄才之事無所不與高文大冊多出其
手而公所自喜獨擅者則當制之文典雅深厚上
不失訓詞之體而下亦厭于人心鄉會所舉皆一
時名士其後或成鉅公今大宗伯孫公慎行公順
天所舉也人服其鑒其在國子儼然以尊師道爲
已任而意歸于長育曰北李南陳遺規具在可循
也定畿省選士之法以實太學最爲折衷部議以
爲當是時公以壯年負經世策略熟先朝典章證

嚮今古觀悉利病又喜接士大夫士大夫暱就公
譚闌及時政人材間有之而忌者眈眈矣于是給
事中某有言公一具疏辯亟請歸自是不復召自
公之歸而其第大叅公亦謝河南學政歸至是泰
安公年八十矣杖履無恙公卽里第築長春樓以
居泰安公又推泰安公意置義田以贍族而名其
庄曰景范風日晴美則兄弟相約以軟輿輕舫從
泰安公于谿山間怡然有終焉之意會方伯君亦
以春秋魁南宮成進士公喜曰家國有寄矣及泰
安公歿大叅公繼之公不勝慘惸竟用不起年止

五十二天下皆以公之不竟用爲惜也公體貌魁
梧舉止詳華在班行中軒軒如霞舉胸懷開霽泛
愛而多容人無貴賤一被延接凡有緩急無不爲
悉力至於推轂名流獎進後學孳孳然不啻口出
人謂公大如海一日柄用必能合天下之心收天
下之材以爲國家用而或者卽以其善合而訾之
嗟乎仕宦難矣至于詞林則世所稱無患坦途也
然以余耳目覩記氣誼設則擬其力用之盛門戶
寬則擬其羽翼之成若反是而矜局守高多示不
可之色則又將以險危擬之矣然則木天尺地庸

詎知非羊腸九折之路乎當公之及第而其第一
人爲江陵子亦同兄弟舉楚風之競惟此一時公
于此際有所馮依連附易緣耳及乎平津客散全
楚蒙淄而公能脫然于其父子間亦可以信公之
志義也已而世之慕用公者亦皆樂其春融而忘
其秋烈要未爲知公之全也公居家敦睦居鄉長
厚里中士待公以發名者甚多爲文章規摹臺閣
而以藻雅出之要歸于元氣卒如其人云生嘉靖
庚戌十月七日卒萬曆壬寅十一月廿五日娶歐
陽氏繼次戴氏贈封皆孺人子二長卽方伯君丁

泰娶方尚書逢時女次引萃女一適御史尹良任
子指揮使際盛孫男某某孫女某某適某某以某
年月日葬沌口之原公同年故光祿鄒孚如楚之
君子也其狀公比于古之大人長者言當不誣余
以所獲交于公而窺其一二者爲附而志之銘曰
蜀江東廻漢水北來滙於沌口鍾此瑰瓌有焯漢
陽二爽惟競伯也哀然仲亦後勁花萼之光掩彼
周行誰尸壘唱實惟元方右室抽籤鑿坡視草金
華啓沃宸旒斧藻乃司棘院乃正虎闥乃材杞梓
棟於殿扉帝夢方殷人猜已至鴻飛冥冥弋者何

卷十一
恭雷雨屯膏貯彼夢澤爰授龍子飛涎噴液四岳
雲興三湘源遠榮光肆浮其徵在沱鬱鬱高岡蕭
史之阡於赫寵綸臣銘麗焉

明通議大夫太常寺卿桂渚洪公墓誌銘

往余貳留禮攝事留工則今太常洪公爲曹郎所
爬搔節縮日與諸曹及中貴人爭論至于竹頭木
屑無不敝舌焦唇不少假借南中士夫齷齪者或
苦其煩苛而賢者每私嘆以爲難蓋終公在曹九
年所省金錢無算而官亦沈滯不得遷久之乃晉
光祿少卿自光祿而太常提督四夷館時有御史
劾顧公憲成以其講學且左袒淮撫公上書白顧
公謂御史言過于是諸不悅顧公者咸側目公以
爲東林之黨東林者顧公講學處也公遂以奉使

荆浩歸里尋轉大理寺右少卿丁內艱家居十餘
年光皇登極乃起公守故官晉太常寺卿管少
卿事時神光三帝當祔廟宗伯議桃憲宗
而當獻皇之祔也人謂其曾臣武宗又未正
衣極乃稱宗人廟且居武宗上于禮未協公以
職在太常得與聞祀事故議桃獻皇與宗伯左
事遂不行而王何公亦逝矣公之歷官孤介強執
獨行其意不爲人撓新卒如此其初以己丑進士
筮仕尹曹郎與同曹郎上書請建儲也改儀曹
教習駙馬都尉儀郎何公喬遠以奏對註誤謫公

以同曹聯事力乞歸宗伯不可隨轉考功主事請
益力或謂少須之可徼滿考恩公曰吾先人望我
不在此竟引疾去去之五載上有所督過銓臣
空其曹而公與馬人以爲枉而公安之不置辯踰
歲以主事起南京工部虞衡司稍遷營繕員外都
水郎中皆恪其其職故事上供物料臺省及部
郎會估然皆臺省爲政部郎唯唯而已而臺省復
一切憑中璫之成例其估直不啻數倍公每事裁
節仍召匠製造視其費以爲高上璫亦不能難其
非舊制而璫輩夤緣特旨官索如板枋等類公

皆抗疏力爭間亦得請又復棕毛之稅于官華柴炭灰煤諸稅墻不得漁獵人服其風力至木植召買定價而後招寅緣遂絕 皇陵祭器每三歲一修公所造堅好簿而藏之積省歲修費匠丁苦扒平銀爲累公定爲按季徵收之法而蠲減其貧薄者惟闢故事與臺省俱率不時至商困于留滯公以五月爲期自行抽放皆大爲公私便利而其最裨于公家者無如鼓鑄始寶源局興胥役輩不利用錢爭言其不便公持之甚堅募匠增爐諸官俸兵糧及軍士麥銀率酌分數配給不一歲贏藏金

至七萬餘其積剩餘錢盡輸之公不私一文留都
至今遵其成畫不敢失又議易外城以裨建浦口
城以固保障後皆見施行在光祿屢疏請慎

中旨謹祭祀節賞賚革鋪墊廣積貯覈器皿汰冗
員語皆恻切 神皇雖不盡從而 景命齋醮從

此遂停其以常少提督與顧公同推 神皇用公
公不欲先顧公再疏請告不允乃受職自是鎮撫
有缺人多舉公公輒力辭余時在政地見士大夫
有美官必爭爭而不遂詎厲隨之如洪公者可易
得哉公自大理歸已無心復出出而遽沒不得究